

■ BCG E PRO SENECTUTE

Preparan seniors per l'e-banking

(cp) L'internet daventa era per attempadas ed attempads adina pli impurtant. Tant la Banca Chantunala Grischuna (BCG) sco la Pro Senectute resguardan quai er en lur program da perfecziun. Els s'adresseschan perquai a senioras e seniors che vullessan sa profundar en il tema e-banking. Sco partenari da la Pro Senectute sustegna la BCG occurrenzas, curs e cussegliaziun e promova uschia l'indipendenza e la qualidad da viver en la vegliadetgna. Latiers po l'internet contribuir essenzialmain. El pussibilitescha er a seniors e senioras da pudair liquidar ils pli divers pensums da chasa anora. Adina pli blers attempads nizzegian las multifarias pussaivladads da servetschs online.

En il curs «Digital Banking heute», da la BCG e Pro Senectute, vegn mussà a senioras e seniors co ir enturn cun l'e-ban-

king. Els vegnan orientads davart la «Mobile Banking App». Uschia emprendan els d'enconuscher ils avantatgs e las diversas variantas da pajar senza daner blut, pon s'infurmar da tut temp davart lur conto e far cumadaivlamain ils pajaments.

Il curs è gratuit e vegn era dà a Glion, Scuol, Domat, Lai e Flem. Senioras e seniors da San Murezzan e Val Müstair profiteschan vinavant da la cussegliaziun gratuita en dumondas da daners e facultad tras in expert da la BCG. *Flavian Gieriet*, mander dal «Contact Center e-Banking» e *Luca Hosang*, cussegliader dad e-banking da la BCG, disponan da lunga experientscha professiunala ed infurmeschan cumpetentamain. Il program per il 2. semester da 2016 sa chatta en l'actuala purschida da curs.



Tant la Banca Chantunala Grischuna (BCG) sco la Pro Senectute resguardan e-banking en lur program da perfecziun per senioras e seniors.